



# ՀԱՅԱՍՏԱՆԻ ՀԱՆՐԱՊԵՏՈՒԹՅԱՆ ԳՆՈՒՄՆԵՐԻ ՀԵՏ ԿԱՊՎԱԾ ԲՈՂՈՔՆԵՐ ՔՆՆՈՂ ԱՆՁ

ք. Երևան

12.02.2021թ.

## Ո Ր Ո Շ ՈՒ Մ

### ՀՀ գնումների հետ կապված բողոքներ քննող անձի թիվ ՍՑ-ՆԳ-2021/28

Հայաստանի Հանրապետության գնումների հետ կապված բողոքներ քննող անձը՝ ի դեմս Գրիգոր Ներսիսյանի,

Մասնակցությամբ՝

«Հ.Ա.Ն.Ս-Ֆուդ» ՍՊԸ-ի ներկայացուցիչ Ա.Պարանյանի (լիազորագիր՝ տրված 10.02.2021թ.),

ուսումնասիրելով Հայաստանի Հանրապետության ֆինանսների նախարարության 01.02.2021թ. թիվ 26/26/1200-2021 գրությամբ «Հ.Ա.Ն.Ս-Ֆուդ» ՍՊԸ-ին գնումների գործընթացին մասնակցելու իրավունք չունեցող մասնակիցների ցուցակում ներառելու նպատակով նախաձեռնված ընթացակարգով ներկայացված հիմքերը, պարզեցի հետևյալը.

#### **1. ՀՀ ֆինանսների նախարարության ներկայացրած փաստերը և պահանջը.**

ՀՀ ֆինանսների նախարարությունը ՀՀ պաշտպանության նախարարության 27.01.2021թ. թիվ ՊՆ//334-2021 գրության հիման վրա 01.02.2021թ. թիվ 26/26/1200-2021 գրությամբ նախաձեռնել է «Հ.Ա.Ն.Ս-Ֆուդ» ՍՊԸ-ին (հետայսու նաև՝ Ընկերություն) գնումների գործընթացին մասնակցելու իրավունք չունեցող մասնակիցների ցուցակում ներառելու ընթացակարգ:

## **2. «Հ.Ա.Ն.Ս-Ֆուդ» ՍՊԸ-ի ներկայացրած փաստարկները և դիրքորոշումը.**

«Հ.Ա.Ն.Ս-Ֆուդ» ՍՊԸ-ն, պատշաճ ծանուցված լինելով ՍՑ-ՆԳ-2021/28 ընթացակարգի շրջանակներում 12.02.2021թ. ժամը 10:00-ին հրավիրված նիստի վերաբերյալ, ապահովել է իր ներկայացուցչի մասնակցությունը, ով նիստի ընթացքում հայտնել է, որ Պայմանագիրը լուծելիս Պատվիրատուն թույլ է տվել մի շարք ընթացակարգային խախտումներ:

## **3. ՀՀ պաշտպանության նախարարության կողմից ներկայացված փաստարկները և դիրքորոշումը.**

ՀՀ պաշտպանության նախարարությունը (հետայսու նաև՝ Պատվիրատու) ՀՀ ֆինանսների նախարարությանն ուղղված 27.01.2021թ. թիվ ՊՆ//334-2021 գրությամբ հայտնել է հետևյալը.

«Հիմք ընդունելով ՀՀ պաշտպանության նախարարության և ստորև ներկայացված կազմակերպությունների միջև կնքված գնման պայմանագրերի 2.1.7.1 կետերի բ) ենթակետի պահանջները՝ ՀՀ պաշտպանության նախարարությունը 2021թ. հունվարի 22-ին միակողմանի մասնակի լուծել է «Հ.Ա.Ն.Ս.-Ֆուդ» ՍՊԸ-ի հետ 20.02.2019թ. կնքված N ԲՄԱՊՁԲ-7/2-1 ծածկագրով գնման պայմանգրին կից N 2 համաձայնագիրը:

Միաժամանակ տեղեկացնում եմ, որ վերոնշյալ համաձայնագրի լուծման վերաբերյալ գրությունը 25.01.2021թ. հրապարակվել է [www.gnumner.am](http://www.gnumner.am) հասցեով ինտերնետային կայքում»:

Պատվիրատուն, պատշաճ ծանուցված լինելով ՍՑ-ՆԳ-2021/28 ընթացակարգի շրջանակներում 12.02.2021թ. ժամը 10:00-ին հրավիրված նիստի վերաբերյալ, չի ապահովել իր ներկայացուցչի մասնակցությունը:

## **4. ՍՑ-ՆԳ-2021/28 ընթացակարգի քննության համար էական նշանակություն ունեցող փաստերը.**

ՍՑ-ՆԳ-2021/28 ընթացակարգի քննության համար էական նշանակություն ունեն հետևյալ փաստերը.

1. ՀՀ պաշտպանության նախարարության և «Հ.Ա.Ն.Ս.-Ֆուդ» ՍՊԸ-ի միջև 20.02.2019թ. կնքվել է «ԲՄԱՊՁԲ-7/2-1» ծածկագրով պետության կարիքների համար ապրանքի մատակարարման պայմանագիր (հետայսու նաև՝ Պայմանագիր), որի 1-ին կետի 1.1 ենթակետի համաձայն՝ Վաճառողը պարտավորվել է պայմանագրով սահմանված կարգով, ծավալներով, ժամկետներում և հասցեով Գնորդին մատակարարել պայմանագրի N 1 հավելվածով՝ Տեխնիկական բնութագիր-գնման ժամանակացույցով, նախատեսված ապրանքը, իսկ Գնորդը պարտավորվել է ընդունել ապրանքը և վճարել դրա համար:

2. ՀՀ պաշտպանության նախարարության և «Հ.Ա.Ն.Ս.-Ֆուդ» ՍՊԸ-ի միջև 18.03.2020թ. կնքվել է 20.02.2019թ կնքված թիվ «ԲՄԱՊՁԲ-7/2-1» պայմանագրի գնման և վճարման ժամանակացույցերը հաստատելու մասին N 2 Համաձայնագիրը:

3. «Հ.Ա.Ն.Ս.-Ֆուդ» ՍՊԸ-ին ուղղված 22.01.2021թ. թիվ ՆՏԱ-183 ծանուցմամբ ՀՀ պաշտպանության նախարարությունը հայտնել է հետևյալը.

«ՀՀ պաշտպանության նախարարության և «Հ.Ա.Ն.Ս.-Ֆուդ» ՍՊԸ-ի միջև 20.02.2019թ. կնքվել է «ԲՄԱՊՁԲ-7/2-1» գնման պայմանագրին կից 18.03.2020թ. կնքված N 2 համաձայնագրի (այսուհետ՝ Համաձայնագիր) շրջանակներում Ձեր ընկերությունը 2020թ. օգոստոս ամսին պետք է մատակարարեր 7200 կգ պահածոյացված բանջարեղեն (խավիար), որից չի մատակարարել 835.92 կգ պահածոյացված բանջարեղեն (խավիար), հոկտեմբեր-նոյեմբեր ամիսներին պետք է մատակարարեր 14400 կգ պահածոյացված բանջարեղեն (խավիար), սակայն չի մատակարարել:

Հիմք ընդունելով թիվ «ԲՄԱՊՁԲ-7/2-1» գնման պայմանագրի (այսուհետ՝ Պայմանագիր) 2.1.7.1 կետի բ) ենթակետի պահանջները՝ ՀՀ պաշտպանության նախարարությունը 2021թ. հունվարի 22-ին միակողմանի մասնակի լուծել է Համաձայնագիրը»:

4. Պատվիրատուի կողմից [www.procurement.am](http://www.procurement.am) հասցեով գործող ինտերնետային կայքում 25.01.2021թ հրապարակվել է Համաձայնագիրը միակողմանի մասնակի լուծելու մասին ծանուցումը:

**5. ՀՀ գնումների հետ կապված բողոքներ քննող անձի հիմնավորումները և եզրահանգումը.**

ՀՀ գնումների հետ կապված բողոքներ քննող անձ Գրիգոր Ներսիսյանս, ուսումնասիրելով ՀՀ ֆինանսների նախարարության 01.02.2021թ. թիվ 26/26/1200-2021

գրությունը, ՀՀ պաշտպանության նախարարության 27.01.2021թ. թիվ ՊՆ//334-2021 գրությունը և կից փաստաթղթերը, հայտնում են հետևյալը.

«Գնումների մասին» ՀՀ օրենքի (հետայսու նաև՝ Օրենք) 6-րդ հոդվածի 1-ին մասի 6-րդ կետի համաձայն՝ բացառությամբ նույն օրենքի 23-րդ հոդվածի 1-ին մասի 1-ին, 3-րդ, 4-րդ և 5-րդ կետերով նախատեսված ընթացակարգով գնում կատարելու դեպքերի, գնումների ընթացակարգերին մասնակցելու իրավունք չունեն այն անձինք, որոնք հայտը ներկայացնելու օրվա դրությամբ ներառված են գնումների գործընթացին մասնակցելու իրավունք չունեցող մասնակիցների ցուցակում: Մասնակիցն ընդգրկվում է նշված ցուցակում, եթե՝

ա. խախտել է պայմանագրով նախատեսված կամ գնման գործընթացի շրջանակում ստանձնած պարտավորությունը, որը հանգեցրել է պատվիրատուի կողմից պայմանագրի միակողմանի լուծմանը կամ գնման գործընթացին տվյալ մասնակցի հետագա մասնակցության դադարեցմանը,

բ. որպես ընտրված մասնակից հրաժարվել է պայմանագիր կնքելուց,

գ. հայտերը բացելուց հետո հրաժարվել է գնման գործընթացին հետագա մասնակցությունից:

Օրենքի 6-րդ հոդվածի 2-րդ մասը սահմանում է, որ գնումների գործընթացին մասնակցելու իրավունքից զրկված մասնակցի վերաբերյալ ունեցած տեղեկությունների հիման վրա լիազորված մարմինը ընթացակարգ է նախաձեռնում գնումների հետ կապված բողոքներ քննող մարմնում՝ առանց վճարի: Տվյալ մասնակցի կարծիքը լսելուց հետո գնումների հետ կապված բողոքներ քննող անձը սույն օրենքի 50-րդ հոդվածի 6-րդ մասով սահմանված ժամկետում որոշում է կայացնում մասնակցին սույն հոդվածով նախատեսված ցուցակում ընդգրկելու վերաբերյալ: Անձը նշված ցուցակում ընդգրկվում է երկու տարի ժամկետով:

Պայմանագրի 8-րդ կետի 8.1-րդ ենթակետի համաձայն՝ **Պայմանագիրն ուժի մեջ է մտնում Կողմերի ստորագրման պահից և գործում է մինչև կողմերի՝ պայմանագրով ստանձնած պարտավորությունների ողջ ծավալով կատարումը:** Պայմանագրով սահմանված ծառայության մատուցումը նախատեսվում է իրականացնել 2018-2020թթ. համաձայնագրերի կնքման միջոցով:

Պայմանագրի 8-րդ կետի 8.5-րդ ենթակետի համաձայն՝ **պայմանագրում փոփոխություններ և լրացումներ կարող են կատարվել միայն Կողմերի փոխադարձ**

**համաձայնությամբ՝ համաձայնագիր կնքելու միջոցով, որը կհանդիսանա պայմանագրի անբաժանելի մասը:**

Պայմանագրի 8-րդ կետի 8.9-րդ ենթակետի համաձայն՝ Վաճառողի կողմից ստանձնած պարտավորությունները չկատարելու կամ ոչ պատշաճ կատարելու հիմքով **պայմանագիրն ամբողջությամբ կամ մասնակի միակողմանի լուծելու մասին** ծանուցումը Գնորդը հրապարակում է [www.procurement.am](http://www.procurement.am) հասցեով գործող ինտերնետային կայքի «Պայմանագիրը միակողմանի լուծելու մասին ծանուցումներ» բաժնում՝ նշելով հրապարակման ամսաթիվը: Վաճառողը, պայմանագիրը միակողմանի լուծելու վերաբերյալ, համարվում է պատշաճ ծանուցված՝ ծանուցումը, սույն կետով սահմանված հրապարակվելուն հաջորդող օրվանից:

Պայմանագրի 2.1.7 ենթակետի համաձայն՝ **Պարզվիրարուն իրավունք ունի միակողմանի լուծել պայմանագիրը**, եթե Վաճառողն էականորեն խախտել է պայմանագիրը:

2.1.7.1 ենթակետի համաձայն՝ Վաճառողի կողմից պայմանագիրը խախտելն էական է համարվում, եթե՝

ա) մատակարարվել է անպատշաճ որակի ապրանք, որը չի կարող փոխարինվել Գնորդի համար ընդունելի ժամկետում,

բ) ապրանքի մատակարարման ժամկետները խախտվել են 40 օրից ավելի:

Այսպես, ՀՀ պաշտպանության նախարարության և «Հ.Ա.Ն.Ս.-Ֆուդ» ՍՊԸ-ի միջև 20.02.2019թ. կնքվել է «ԲՄԱՊՁԲ-7/2-1» ծածկագրով պետության կարիքների համար ապրանքի մատակարարման պայմանագիր, որի 1-ին կետի 1.1 ենթակետի համաձայն՝ Վաճառողը պարտավորվել է պայմանագրով սահմանված կարգով, ծավալներով, ժամկետներում և հասցեով Գնորդին մատակարարել պայմանագրի N 1 հավելվածով՝ Տեխնիկական բնութագիր-գնման ժամանակացույցով, նախատեսված ապրանքը, իսկ Գնորդը պարտավորվել է ընդունել ապրանքը և վճարել դրա համար:

ՀՀ պաշտպանության նախարարության և «Հ.Ա.Ն.Ս.-Ֆուդ» ՍՊԸ-ի միջև 18.03.2020թ. կնքվել է 20.02.2019թ կնքված թիվ «ԲՄԱՊՁԲ-7/2-1» պայմանագրի գնման և վճարման ժամանակացույցերը հաստատելու մասին N 2 Համաձայնագիրը:

«Հ.Ա.Ն.Ս.-Ֆուդ» ՍՊԸ-ին ուղղված 22.01.2021թ. թիվ ՆՏԱ-183 ծանուցմամբ ՀՀ պաշտպանության նախարարությունը հայտնել է հետևյալը.

«ՀՀ պաշտպանության նախարարության և «Հ.Ա.Ն.Ս.-Ֆուդ» ՍՊԸ-ի միջև 20.02.2019թ. կնքվել է «ԲՄԱՊՁԲ-7/2-1» գնման պայմանագրին կից 18.03.2020թ. կնքված N 2 համաձայնագրի (այսուհետ՝ Համաձայնագիր) շրջանակներում Ձեր ընկերությունը 2020թ. օգոստոս ամսին պետք է մատակարարեր 7200 կգ պահածոյացված բանջարեղեն (խավիար), որից չի մատակարարել 835.92 կգ պահածոյացված բանջարեղեն (խավիար), հոկտեմբեր-նոյեմբեր ամիսներին պետք է մատակարարեր 14400 կգ պահածոյացված բանջարեղեն (խավիար), սակայն չի մատակարարել:

**Հիմք ընդունելով թիվ «ԲՄԱՊՁԲ-7/2-1» գնման պայմանագրի (այսուհետ՝ Պայմանագիր) 2.1.7.1 կետի բ) ենթակետի պահանջները՝ ՀՀ պաշտպանության նախարարությունը 2021թ. հունվարի 22-ին միակողմանի մասնակի լուծել է Համաձայնագիրը»:**

Պատվիրատուի կողմից [www.procurement.am](http://www.procurement.am) հասցեով գործող ինտերնետային կայքում **25.01.2021թ հրապարակվել է Համաձայնագիրը միակողմանի մասնակի լուծելու մասին ծանուցումը:**

Այսպիսով՝ Գնումների հետ կապված բողոքներ քննող անձն արձանագրում է, որ Պատվիրատուն, հիմք ընդունելով Պայմանագրի 2.1.7.1 ենթակետի բ) պարբերության պահանջը, միակողմանի մասնակի լուծել է Համաձայնագիրը, որի վերաբերյալ ծանուցումը 25.01.2020թ. հրապարակել է [www.procurement.am](http://www.procurement.am) հասցեով գործող ինտերնետային կայքում:

Պայմանագրի 2.1.7 ենթակետով սահմանված է Պատվիրատուի կողմից **Պայմանագիրը միակողմանի լուծելու իրավունքը**, մինչդեռ Պատվիրատուն միակողմանի մասնակի լուծել է 20.02.2019թ. կնքված թիվ «ԲՄԱՊՁԲ-7/2-1» պայմանագրի հիման վրա Կողմերի միջև կնքված Համաձայնագիրը, որը, համաձայն Պայմանագրի 8-րդ կետի 8.5-րդ ենթակետի, հանդիսանում է Պայմանագրի անբաժանելի մասը:

«Գնումների մասին» ՀՀ օրենքի 6-րդ հոդվածի 1-ին մասի 6-րդ կետի «ա» ենթակետը սահմանում է, որ **մասնակիցն ընդգրկվում է գնումների գործընթացին մասնակցելու իրավունք չունեցող մասնակիցների ցուցակում, եթե խախտել է պայմանագրով նախատեսված պարտավորությունը, որը հանգեցրել է պատվիրատուի կողմից պայմանագրի միակողմանի լուծմանը:**

Այսպիսով՝ գտնում եմ, որ Համաձայնագրի լուծման պայմաններում «Գնումների մասին» ՀՀ օրենքի 6-րդ հոդվածի 1-ին մասի 6-րդ կետի «ա» ենթակետով նախատեսված

պատասխանատվությունը չի կարող վրա հասնել և հանգեցնել «Հ.Ա.Ն.Ա.-Ֆուդ» ՍՊԸ-ին գնումների գործընթացին մասնակցելու իրավունք չունեցող մասնակիցների ցուցակում ներառելուն:

Ելնելով վերոգրյալից և ղեկավարվելով «Գնումների մասին» ՀՀ օրենքի 50-րդ հոդվածի 7-րդ մասի 2-րդ կետով՝

## Ո Ր Ո Շ Ե Ց Ի

Հայաստանի Հանրապետության ֆինանսների նախարարության 01.02.2021թ. թիվ 26/26/1200-2021 գրությամբ «Հ.Ա.Ն.Ա.-Ֆուդ» ՍՊԸ-ին գնումների գործընթացին մասնակցելու իրավունք չունեցող մասնակիցների ցուցակում ներառելու նպատակով նախաձեռնված ընթացակարգը մերժել:

ՀՀ գնումների հետ կապված բողոքներ քննող անձի որոշումն իրավապարտադիր է և ուժի մեջ է մտնում տեղեկագրում հրապարակվելու հաջորդ օրը:

ՀՀ գնումների հետ կապված բողոքներ քննող անձի որոշումը կարող է փոփոխվել կամ վերացվել, այդ թվում՝ մասնակի, միայն դատարանի կողմից:

**Գնումների հետ կապված  
բողոքներ քննող անձ՝**



**ԳՐԻԳՈՐ ՆԵՐՍԻՍՅԱՆ**